

Pip Thessalonica-areny-rnem-warl, Namp 1

Angka nhenhan alakenh aynteyel

Paul-el Silas-el Timothy-el-akerr rernem pip nhenh thwenew akngerr Akngey-wenh-rnemew apmer Thessalonica-warl. Pip-angkwarr rernem akngerr ilem arraty, rlterrk anaynteyew Akngeyew.

Thessalonica tawen ayntenh apmer Macedonia-itwew. Paul Silas Timothy-akerr alhew apmer ikwer-warl, angka mwerr-angker Jesus-akert ilaynteyew. Apmer ikwer-areny-rnem ampwal ahern-areny-rnemew-tangkwel kwenerrenh. Akngeyan rernem iterl-arey-angenh. Rernemar angka mwerr-angker Jesus-akert awew, ingwerenty Christian-anem irrew.

Jew ingwer-rneman arlkarerrenh, angka Jesus-akert awewerr. Rernemap arlkarerrenh Paul-rnem-wety, apmer ikwer-they renh-rnem irrentenh. Rernemap anterrew tawen Berea-warl, ikwer-they tawen Corinth-warl-anem. Angka nhenhan aynteyel Acts-itwew (Acts 17:1-16).

Timothy ra angkep alpew Thessalonica-warl, Christian rlenkeny-rnem rlterrk-aynteyew. Rarl apew-alpew angkakert Corinth-warl Paul-rnem-warl, rernemap pip nhanyem-anem ingkwernew, thwenew-anem Thessalonica-areny-rnem-warl.

Thessalonica-areny-rnem Akngeyew arraty anenh mwerrant-arey. Paul-rnem inkwerelhew ikwer-rnem artewenty. Ingwerentyan intem iterrenh arlta ikwer, Jesus-arl apetyeyenhew angkep. Ingwer-rnem warrk-wety ipmelhew, apmwel-ayeth iterrew, "Jesus angkep rlungk-antey apetyeyenh." Ingwer-rneman artewenty iterrenh ahaperrewarl-rnemew. Rernem iterrenh apmwel-ayeth, "Jesus-arl angkep apetyeyenhel, ikwerenh-rnem ineyew, ra renh-rnem iwerl-alhewerr."

Paul-rnemel alakenh pip nhenhan ingkwernew, renh-rnem akalty-antheyew arraty. Aley-anem angka aynteyel "Thessalonica-areny-rnem-warl Namp 1" (1 Thessalonians).

¹ Atharl Paul-el pip nhenhan angkakert ingkwerneyel. Atha Silas-el Timothy-el-akerr anantherrarl thweneyel angka nhenhan arrewantherr, Akngey-wenh-rnemew Thessalonica-areny-rnemew. Arrantherran Jesus Christ apenteyel-rnem. Anantherrap Akngeyarl ayern-ayntem, arrewantherr athamerr-aynteyew, inweng-then arternpel-aynteyew.

*Akngeyel
rlterrkeleyel*

Thessalonica-areny-rnem

² Anantherran Akngey nakem, arrantherrarl renh mwerr-angkwarr apenteyel. Anantherrarl angkem Akngey-warl-athek, renhap ayern-ayntem arrewantherr.

³ Anantherr iterl-areyel, arrantherrarl warrk mwerr-angker mpwarem intem, rlterrk iterremel ikwer. Arrantherran inngarl ilkelheyel ingwer-rnemew, mwerr-angker-then intem mpwareyel ikwer-rnemew. Arrantherrap rlterrk anem, ingwer-rnemelarl arrenhantherrenh irrwernem-angkwarran. Arrantherr arternp arntarnt-arelheyel, Jesus rarl apetyeyenhew angkep.

⁴ Anewantherrenh-rnemay Christian-rnem! Akngey ilkelheyel arrewantherr, arntarnt-areyel mwanty arrenhantherrenh. Anantherran iterl-areyel, rarl arrenhantherrenh ayerrpelew.

⁵ Arrantherrap awew, arrakertelarl anantherr ilenh. Inweng Mwerr-angker-akertel anantherr akalty-anthenh, ilek-ilek mwerr-angker mpwaremel. Arrantherran iterl-areyel, anantherrarl arrewantherr-itwew mwerr-angkwarr anenh.

⁶ Arrantherrap arew-anem, anenhantherrenhap iwarrernew-anem. Arrantherrap Ingartthenarl iwarrernew alakenh. Ikwereng-arey ingwer-rnemel arrenhantherrenh irrwernenhangkwarran, Inweng Mwerr-angkerel arrenhantherrenh rlterrkelenh, inkwerelhemel awelh-aynteyew angka ikwerew.

⁷ Awethem arrantherr yanh-angkwarr irrew, ingwer-rnemel areyew. Apmer atherr-areny-rnemelap arrenhantherrenh arew; Macedonia-areny-rnemel-then Achaia-areny-rnemel-then.

⁸ Akngerrel angka Jesus-akert awew apmer ikwer-atherr-itwew, apmer ingwer-rnem-theythen. Rernem ingkerrenhel awew, arranther-

rarl Akngeyew iterrew arraty-angkwar. Nthakenh anantherr iley-angenh arrewantherr-akert, rernemar kel amentel-antey awew.

⁹⁻¹⁰ Apmer ingwer-areny-rnemelar angka arrewantherr-akert awew, rernemap ingkerrenh ilew. Ingkerrel-anem iterl-areyel, arrantherran Thessalonica-areny-rnem anewantherr inkwerelhew, anantherrarl angka Akngey-wenh mwanty anayntelemel ilew. Rernem ilenh, arrantherr kwenerrenh ampwal apmwa ahern-areny-rnemew-tangkwel itethew-arrpantey. Aleyan arrantherrap ipmelhew-anemar alakenh-wety. Apmwangkwarr-tangkwel arrantherr iterrenh, aleyan Akngeyewant-anem iterreyel. Rarl anyent itetharl aneyel intem, rap Alerikw ikwerenh itethelew ipmethey. Arrantherr arntarnt-arehemel mpwelheyel, Jesus-arl angkep apetyeyenhew irrwerl-they. Ikwerenh-rnemarl ra inerl-alpeyenh. Akngey ra nthakenh ikwer-rnem awakelhey-angenh, rarl ingkerrenh court-emelemel ayerneyenheng-areyan.

2

*Paul-el angka mwerr-angker ilew
Thessalonica-itwew*

¹ Anewantherrenh-rnemay Christian-rnem! Arrantherr iterl-areyellar, anantherran arwa arrkent akalty-anthey-angenh. Arrantherrap iylparethel awew.

² Arrantherr iterl-areyel arrpemar, anantherrarl apmer Philippi-warl-tangkwel alhew. Akngerr apmer ikwer-areny-rnemel

iltew, pwarrk anthew anenhantherrenh. Anantherrap alhew apmer arrewantherrenh-warl-anem. Akngeyelanap anenhantherrenh riterrkelew-antey, ingwer-rnemelarl artewentyel irrwernenheng-arey. Alakenh-angkwarranap anantherr angka mwerr-angker arrewantherr alhewer-anemarl ilenh.

³ Mwerr-angkwarr anantherr arrenhantherrenh ilenh. Arrenhantherrenh apmwel-ayeth akalty-anthey-angenharl, arrantherr apmwangkwarr alheyew, arrangkw. Anantherran arrkernelhey-angenharl, ilkwa aneyew, arrangkw, arrantherraw areyew nakemel. Anantherr terikemeley-angenh arrenhantherrenh, arrangkw. Alakenhan anewantherrenh-angkwarr-weny.

⁴⁻⁵ Nthakenh anantherr ingwer-rnem ikwer-rnem-wenh-angkwarr iley-angenh, rernemaw nheng awelheyew-awaty, rernemap apwert antheyew-awaty anewantherr ikwer-penh. Arrangkw. Nthakenh anantherr irrtyertel ingwer-rnem nakey-angenh, renh-rnem irrngerney-antheyew. Arrangkw. Akngey renhant anantherr irrngerney-anthaynteyew. Ra iterl-areyellarl, anantherr ikwerenh-angkwarr iterreyel. Anantherr arraty-angkwarr angkem intem-antey apmellerrel-ayeth. Akngeyel awem, rap angkem, "Rernem arraty-angkwarr angkeyel. Rernemap angka atyenhan intem-antey ileyn-aynteyew." Ranap aweyellarl, anantherrarl alakenh angkeyel arrewantherr.

⁶ Anantherrap warrkerreyel ikwerenh-angkwarr. Alakenhap anantherr ilkelhey-

angenh, ingwer-rnemel anenhantherrenh nakaynteyew, ilkwa antwemel.

⁷ Anantherr alhew arrewantherr-warl, Christ rarl thwenew anenhantherrenh. Artwa ilkwernem-apenyap anantherran. Kel pwerep-anthey-angenh arrenhantherrenh, arrangkw. Alyepel-antey angkenh arrewantherr athamerremel, amikwarl ampa ikwerenh-rnemew athamerrem-apeny-angkwarr.

⁸ Anantherrap ilkelhew arrewantherr artewenty inngarl, anyent-anem irremel arrewantherr-itwel. Inkwerelhemelap arrenhantherrenh ilew angka mwerr-angker, Akngeyel rarl anthew.

⁹ Arrantherr iterl-areyelarl, anantherrarl iltyel warrkerrenh, arrenhantherrenharl akalty-anthenheng-arey. Arlta arrpanenhelap warrkerrenh anantherr, apwert amernew ineyewan, arrewantherrew aparelhey-angenhel.

¹⁰ Anantherr anew-anenh arraty-angkwarr arrewantherr-itwel, arrantherr arenh. Akngeyelan arew arrpemarl irrwerl-theyan.

¹¹ Arrantherr iterl-areyelarl, anantherrarl arrenhantherrenh arntarnt-arenh, aynelikwarl alerikw ikwerenh-rnem arntarnt-arem-apeny. Alakenh. Akalty-antherl-apenh rlterrkelemel arrenhantherrenh.

¹² Ilemel arrenhantherrenh, arraty anaynteyew, Akngeyaw inkwerelheyew-ayteng. Rlwaneynew ra arrenhantherrenh, alpeyew aney-alpeyew ikwer-itwel irrwerl, rarl atyetyart ilkwa aneyel-itwel.

13 Anantherrarl anenh arrewantherr-itwel, angka Akngey-wenh ilenh, arrantherrap inkwerelhemel iylpareth awelhew. Aleyan Akngeyan nakemel iterl-arem anantherr, arrantherrarl arraty iterrenh alakenh: "Angka nhenhanap artwewenh-weny, arrangkw. Innga angka Akngey-wenharl nhenhan." Akngeyan arrewantherr angkew, alakenh rlterrk-ayteng iterr-aynteyew ikwer. Aleyan ra angkeyel-antey.

14 Anewantherrenh-rnemay! Arrewantherrenh-rnemel arrenhantherrenh irrwampenh-anthenh. Apmer ingwer-itwew Judea-itwew-tangkwel alakenh aytew arrpemar. Jew ahelengkw-rnemel Christian-rnem atwenh apmer ikwer-itwew.

15 Awank-akerr Jew ahelengkw-rnemel atwenh ipmew angkakert Akngey-wenh-rnem-tangkwel. Alakenh arrpemar Jew ahelengkw ingwer-rnemelan Jesus renh ipmew atwew. Aleyan anwenantherrenh-anemar irrentew apmer ingwer-rnem-they. Rerneman akngerr-wety ilkelhey-angenh. Kel Akngeyan ikwer-rnem inkwerelhey-angenh arrpemar.

16 Nthakenh anantherr alethang-rnem angka mwerr-angker iley-angenh, ahelengkw-rnemel-anem anenhantherrenh artwerelenharl. Alakenhan ingwer-rnem apatelhelenh, angka awewerr, angkeperrenhey-alpewerr Akngewar-athek. Rernem intemar apmwelhelenh alakenh, apmwa innganemap mpwarew artewenty. Kel Akngeyanap artewenty inngarl ahelerreyel ikwer-rnem, rap renh-rnem irrwampenh-antheyen-anem artewenty.

Paul-rnem ilkelheyel, Thessalonica-areny-rnem areyew

¹⁷ Jew ahelengkw-rnemel anenhantherrenh artwerelenh, anantherrap alpew-tangkwel Thessalonica-they. Anantherrap alharntew arrewantherr, ampa akely iwerl-alhenty-apeny. Anantherr artewentyel iterrenh arrewantherr intem-antey, ywarn iterremel, arrenhantherrenh arerl-alpeyew.

¹⁸ Ayeng Paul arrkernelhew akngerr-inger, ar-renty ilkwelanap arrngertewew.

¹⁹⁻²⁰ Anantherr inkwerelheyel innga arrewantherr. Jesus-arl apey-alpeyenhel, ingkerrenh ayerneyew, anantherrap inkwerelhemel ileyenh angka arrewantherr-akert. Ya, innga ananther-ran inkwerelheyel arrewantherr.

3

¹ Kel arleng-alenty anantherr anenh tawen Athens nhenh-itwew, alharntemel anenh arrewantherr. Silas aylanth angkerrew, “Mwer-rangay aylanth arteny anem? Timothy-ant apek alhemer Thessalonica-warl.”

² Renhantap aylanth thwewew arrewantherr-warl. Anantherr ingkerr warrkerreyel, angka mwerr-angker Akngew-wenh ilerl-apaynteyew apmer arrpanenh-itwew. Renhap aylanth thwewew, rlterrkelemel akalty-anthaynteyew arrenhantherrenh.

³ Akngeyel ilew arrwekel-antey, ingwer-rnemelarl irrwernerl-aneyenh. Rernemap apmelerr-angkwarr irrwernem Christian-rnem anenhantherrenh. Anantherran iterrew arrewantherr, angkeperrewerr apek

Akngzey-wety, ingwerentyel arrenhantherrenh irrwerentyel.

⁴ Anantherrarl anenh arrewantherr-itwel, anantherr ilenh alakenh, "Ingwer-rnemelan Christian-rnem anenhantherrenh irrwerneyenh, apmwangkwarrr mpwaremel." Inngarlap anewantherr alakenh-anyem ayntyel.

⁵ Alakenh-wety anantherr artewentyel iterrenh arrewantherr, angkeperrewerr arrantherr. Anantherr iterrenh alakenh, "Alep Akngzeyant rernem apenteyel-antey? Arrangkwarrr apek. Ywarn apek akalty-anthenh renh-rnem. Arrenty ilkwel apek renh-rnem arrkernew, rernem Akngzey-wety ipmelhenheyew." Alakenh-wety aylanth Timothy thwenew. Anantherr iterlareyew, arrantherr arraty anentyew Akngzeyew.

Timothy inkwerelhemel apew-alpew angkakert

⁶ Aylanthap mpwelhenh arrpemarll Timothyew, rarll apew-alpenhew. Rarl apew-alpewel, iley-alpew-anem aylewanth, "Weth-rnem arraty-antey aneyel Akngzey-angkwarrr, Jesus apentemel. Mwerrant-arey aneyel arntarnt-arerremel. Rernem inkwerelhemel arrpemarll iterreyel anewantherr. Rerneman irkelheyel, mpwelenhanthenh areyew arrpemarll."

⁷ Ya, aylantharl angka awew, aylanthap inkwerelhew artewenty. Angkap arrewantherrakert awew, aylernanthenhap irrngerney-anthew. Ingwer-rnemel irrwerneyel-antey anenhantherrenh, arlkanap alpweyelevel. Anantherranap inkwerelhemel-antey iterreyel arrewantherr.

⁸ Aleyan arlka mwerr-anem anantherr awelhem iterl-aremel, arrantherrarl Akngeyew aneyel-antey intem rlterrk.

⁹ Ya, anantherr iterl-areyel alakenh, Akngeyellarl arrenhantherrenh arntarnt-areyel. Alakenh-anyem ra anenhantherrenh irrngerney-anthem. Anantherr intem-antey inkwerelhemel renh nakem, arrantherrarl ikwer awelheyneyel.

¹⁰ Anantherr rlterrkel mwanty Akngey ayernem, thweneyew angkep arrewantherr-warl. Arrantherran akaltyerreyel-antey Akngey-wenh-angkwarr. Anantherran intem-antey akalty-anthaynteyew arrenhantherrenh.

¹¹ Alakenhewarl Akngeyan anantherr ayerneyel Jesus-then, "Thwenenh-atherr, anantherr alheyew Thessalonica-warl, renh-rnem areyew."

¹² Anantherrap Jesus ayernem, arrantherraw mwerrant-arey anaynteyew, arntarnt-arerr-aynteyew athamerremel ingwer-rnemew-then. Anantherrarl arrewantherr athamerrem-apeny, alakenh.

¹³ Jesus anantherr ayernem, arrenhantherrenh rlterrkeleyew, arrantherr arraty anaynteyew intem-antey. Akngeyelap arem, arrantherrarl arraty aneyel apmwewety. Rap inkwerelheyen arrewantherr, Jesus-arl apeyalpeyenhel irrwerl-they antyerl ikwerenhrnem-akert.

4

Intem-antey anaynteyew alakenh, Akngey inkwerelh-aynteyew

1-2 Anewantherrenh-rnemay! Anantherr akalty-anthenh, Akngeyew arraty anaynteyew, raw inkwerelheyew. Arrantherrap awelhew. Akngeyan inkwerelhem artewentyel arrewantherr. Aleyan Jesus ilkelhem, anantherr ileyn-aynteyew arrpemar! arraty-angkwarr anaynteyew, anantherrarl akalty-anthenh-angkwarr arrwekel-antey. Nthakenh anantherr angka anewantherrenh iley-angenh, arrangkw. Angka Jesus-wenhant anantherr ilenh.

³ Akngeyanap ilkelhem alakenhew: arranther-ran ingwer-rnem-apeny-weny anem, apmwel-ayeth aney-angenh. Artwethen arelh-then ingwer-wenh angwarey-angenh, arrangkw.

⁴⁻⁵ Akngeyan ilkelhem, arelh Christian anaynteyew artwa anyentelant. Artwan irrkaty-angkwarr arrpemar! anaynteyew arelh anyent-akert. Nthakenh iwerrey-angenh! Arntarnt-arerr-aynteyew! Ingwer-rnem-apeny irrey-angenh, Akngey iterl-arey-angenh-rnem-apeny. Artwethen arelh-then rernem rakerrem.

⁶ Akngeyan angkeyel, "Nthakenh ingwerentyak-wenh irrtiyert-ingwey-angenh." Artwa apekar! ywerrem arleng, arelh nthakenh ingwey-angenh anteng. Akngeyanap ahellerremarl ikwer artewenty, rap pwarrk anthem irrtiyert-awarr renh. Arrantherr iterl-areyel-anem, anantherrarl angka nhenh ilenh arrwekel-antey arrpemar! arrewantherr.

⁷ Akngeyelan anenhantherrenh ayerrpelew, ikwerenh-anem anaynteyew. Alakenh-anyem anantherr intem-antey mwerr anerl-anemer rapeny, angkepellarreng apmwelheley-angenh.

⁸ Ingwer-rnemelanap angka ikwerenh iympelant aweyel. Angka nhenhan artwewenh-wenyarl, arrangkw. Angka Akngey-wenhan rernem iympelant aweyel. Akngeyel rantap Inweng Mwerr-angker anthew arrewantherr. Inweng Mwerr-angker renhanap nthakenh iympelant awey-angenh, arrangkw.

⁹ Akngey ra arrenhantherrenh akalty-anthew, mwerrant-arey arntarnt-arerr-aynteyew. Arrantherrap ikwer awelhewarl. Nthakenh ananther-ran akalty-anthey-angenh arrpemarlar pip nhenh-they.

¹⁰ Anantherr iterl-areyel, arrantherrarl arntarnt-areyel Christian ingwer-rnem apmer arrpanenh-areny apmer Macedonia-itwew. Anantherr pip nhenh-angkwarr ileyneyel, arrantherr intem-antey alakenh mpwaraynteyew.

¹¹ Mwerr-angkwarr aynteyel, arraty-anem anaynteyew akeleyt. Ingwer-rnem irrwerney-angenh, ingwer-rnemew-then tyel-angkey-angenh. Mwerr-angkwarr arrpemarlar alakenh aynteyel. Arrantherr warrkerremer, apwert inaynteyew, arnkwithen amern-then payemeleyew. Anantherr ilanthew alakenh arrwekel-antey.

¹² Akngey iterl-arey-angenh-rnemel areyel, arrantherrarl arraty aneyel mwerr, rernemap arrenhantherrenh nakemarl. Arrantherr arraty anenty intem-antey, arrantherrap inkw-erelhemel anenhem, ingwer-rnemew aparelhey-angenh-anem.

Alakenh-anyem aynteyenh, Jesus-arlar angkep

apetyeyenhel

¹³ Anewantherrenh-rnemay! Arrantherran iterl-areyel, Christian ingwer-rneman ahaper-rewarl. Rernemarl iteth anenhel, rernemap Akngey apentenh. Nthakenh arrantherr intem-antey amperrngerrey-angenh ikwer-rnemew, ar-rangkw. Akngey iterl-arey-angenh-rnemant intem-antey artnemel anem apal.

¹⁴ Anantherr ingkerrel Akngey iterl-areyel, Alerikw ikwerenharl Jesus itethelew ipmethy. Anantherrap iterl-areyel, Christian ikwerenhrnem ra itethelem arppemarl ipmethy irrkaty-angkwarr. Rernem itetherreyenhel, Akngeye-lap renh-rnem akarreyenlh Jesus-warl irrwerl. Rernemap aney-alpeyenh intem-antey Akngye-itwel, Christian ingkerr.

¹⁵⁻¹⁶ Christian ingwer-rnem-alew, aleyarl ahern nhenh-itwew iteth aneyel-rnem? Nthakenharl rernem irrem, Jesus-arl apey-alpeyenhel? Jesus-el ilenh alakenh. Rarl apey-alpeyenhel, alakenh-tangkwelap irreyenhan. Antyerl ilkwan arlkeyenh. Antyerl ingwerelan angelh-angelheleyenh terampet atayel innga. Jesus ranem atwarreyenh irrwerl-they, atayel ilan-themel, Christian ipmepenh-rnem itetherrenhey-alpeyew. Rernem-tangkwelap itetherreyenhan ipmethy. Christian iteth-rnem nthakenh arrwekel irrey-angenh, Akngye-itwel aney-alpeyew.

¹⁷ Ikwer-theyan Akngeyel Christian iteth-rnem anenhantherrenh ineyenh, rap akarreyenlh ingkerrenh-anem anenhantherrenh kwenpay-angkwarr. Jesus-anem rlwateyenh irrwerl alker-

itwew, rarl apetyeyenh ingweyew anenhantherrenh. Anantherr aney-alpeyew ikwer-itwel intem-antey.

¹⁸ Arrantherr Thessalonica-areny-rneman intem-antey ilerrerrl-anemer angka nhenh impen arlta ikwerew-atety, irrngerney-antherremel.

5

¹⁻² Anewantherrenh-rnemay! Arrantherr iterl-areyellarl angka weth, Jesus-arl apetyeyenh-akert. Nthakenh anantherr akalty-anthey-angenh intem pip nhenh-they. Anantherr ingkerrel iterl-arey-angenharl, rarl apetyeyenhan. Ikwereng-arey akngerran anerl-aneyenh apal, angka Akngey-wenhew awelhey-angenh. Wetharl irrtiyert-awarr alhem-apeny apmer ingwer-warl ingwel, ran aynteyenh. Apmer ikwer-areny-rnemap apelparl ayntem, ikwer arntarnt-arelhey-angenh. Irrkaty-angkwarr arrpemarl Jesus ran apetyeyenh anamerl-antey, akngerr ikwer arntarnt-arelhey-angenh anerl-aneyenh.

³ Ikwerel-antey akngerr angkerrerrl-aneyenh apal alakenh, "Anantherran mwerrarl aneyel. Nthakenh ingwer-rnemel anenhantherrenh atwey-angenh!" Akngeyelanap renh-rnem pwarrk antheyenh arwapenyarl. Nthakenh irrtiyert anterrey-angenh, irrtiyert aylpeyew, arrangkw. Mwerrant-arey rernem apal anew-anerl-aneyenh arlengew-alenty. Ikwerpenhan renh-rnem Akngeyel pwarrk antheyenh arwapeny artewenty innga.

4-8 Arrantherran ingwer-rnem-apeny-wenyarl, Akngey iterl-arey-angenharl. Atemwengkel-apeny rernem aneyel. Atemwengkel nthakenh arey-angenharl wethey. Christian-rnemew anewanherr alakenh-wenyarl. Lyenentyel-apeny anantherran aneyel. Lyenenty-angkwarran anayntarl arem. Anantherrap intem arntarnt-arelhemer Jesus ikwer, rarl apey-alpeyenhew. Ingwer-rneman ankwel atwenty-apeny aneyel. Wetharl ingwerenty atyek-atyek arntarnt-arelhew-apeny, alakenh arrpemarlarl aynteyel anewanherr Akngey-angkwarran alakenh-anyem. Anantherrap mwerrant-arey arntarnt-arerremem, iterl-arerl-anemel, anantherrarl aney-alpeyenh ikwer-itwel intem-antey.

9 Ra anenhantherrenh ayerrpelew ikwerenh-anem, nthakenh anewanherr awakelhey-angenh. Ra anewanherr ilkelhew, anantherr Jesus apenteyew. Jesus rap anenhantherrenh akngeyneyenh, Akngey-itwel aney-alpeyew intem-antey.

10 Rarl katy ilwew anewanherr, anantherrap alpeyenh, aney-alpeyew ikwer-itwel intem-antey. Christian anyent iylpelerlewem anantherr, kel mwerrarlap alakenhan. Christian ipmepenh iteth-rnem-then ingkerrenh alpeyenh, aney-alpeyew ikwer-itwel.

11 Arrantherr angka nhenh aley ilerreyel-antey, arrantherrap riterrkerremarlarl alakenhan. Intem-antey ilerrerl-ayntenh-arey, arrantherr aneyew inkwerelhemel, intem apentemel.

Alakenh-anyem intem aneyew Akngeyew

¹² Anewantherrenh-rnemay! Mwanty-antey awelh-ayntenh-arey angka nhanyemew. Akngeyel irrpetyap arrernew, atyetyart aneyew Christian-rnemew arrewantherr. Rernem arrewantherr artewenty warrkerrem, mwantyel arntarnt-araynteyew arrenhantherrenh.

¹³ Arrantherran ikwer-rnem awelhemer, rernemarl arrenhantherrenh akalty-antheyel, arraty-angkwarr Akngeyew anaynteyew. Intemarlak ikwer-rnem ilkelh-ayntenh-arey, rernemarl Akngeyew warrkerreyelewan. Akeleyt mwerrant-arey anayntenh-arey, akwetyemel angkey-angenh.

¹⁴ Angka ingwerew nhenhew arrantherr awelhemer arrpemar. Arrantherr ingwer-rnem warrk-wety ipmelhew. Renh-rnem ilemer, rernem warrkerr-aynteyew intem-antey. Ingwer-rnem atererremel anem. Alyep ikwer-rnem angkemer, rernem inkwerelheyew. Ingwer-rneman arlka rlterrk-weny, angkeperrem apek Jesus-wety. Alyep arrpemar ikwer-rnem angkemer, rlterrkelemel renh-rnem. Anamerl-antey ingwer-rnemew ahelerrey-angenh, arwa alpemelemant renh-rnem.

¹⁵ Ingwerentyel apek apmwel-ayeth mpwarem ingwerew. Ra apek ikwer awakelhewerr, arrantherrap renh artwerelemarl. Mwerr arrpemar anayntenh-arey Christian-rnem arrantherran. Mwerrant-arey anayntenh-arey Jesus iterl-arey-angenh-rnemewan.

¹⁶ Inkwerelhemel anayntenh-arey intem-antey.

17 Akngeyew intem-antey angkayntenh-arey, ipmelhey-angenh.

18 Rlterrk apek anem arrewantherr aleyan. Kel mwerrarl alakenhan. Intem-antey renh nakayntenh-arey. Akngeyan ilkelheyel, intem-antey anaynteyew alakenh, Jesus-wenh-anemarl arrantherran.

19 Inweng Mwerr-angker apek angkenty, iylpelant avey-angenh.

20 Ingwerenty apek angkem, "Inweng Mwerr-angker atyeng angkew." Mwentyap awelhenh-arey angka ikwer.

21-22 Akngeyap ayernenh-arey alakenh, "Ar-ratyang ra angkeyel?" Arraty apekarl ra angkeyel, awelhenh-arey angka ikwer. Arrangk-wel apekan, angka ikwer awelhey-angenharl. Ra apek angka arraty avey-angenh. Angka ar-ratyewant awelh-ayntenh-arey. Angka apmwan mentyarl awayntenh-arey.

23 Anantherr Akngey ayerneyel, arrenhanther-renh arntarnt-araynteyew mwanty, arrantherr inkwerelhemel mwerrant-arey anaynteyew. Anantherr ayerneyel renh, arntarnt-araynteyew arrenhantherrenh inweng-then arlkethen ingkerr-antey, arrantherrap anayntem apmwewenyarl. Jesus-arl apetyeyenhel angkep, rap arrenhantherrenh mwerr antweyenh. Nthakenh ingwerentyakel ayntarrp-iley-angenh.

24 Inngarlap Akngeyelan mpwarem alakenh arrewantherr, rarl ayerrpelew arrenhanther-renh. Rap nthakenh iwerl-alhey-angenh arrenhantherrenh, arrangkw-anemarl.

²⁵ Anewantherrenh-rnemay! Anewantherran Akngey ayern-ayntenh-arey arrpemar.

²⁶ Arrantherrarl akarrerreman ingkerrenh, inkwerelhemelap atnyenerrenh-areyan.

²⁷ Angka ingwerant-anem anyent atha Paul-el ileyew arrewantherr, Jesus-elarl aweyel-wety: "Pip nhenhan inenh-arey, reytemelemel Akngey-wenh-rnem ingkerrew, rernemarlk akarrerremew ingkerr."

²⁸ Anantherrap Akngeyarl ayern-ayntem, arrewantherr athamerr-aynteyew, inweng-then arternpel-aynteyew.

Kel-antey.

Alyawarr Bible
Portions of the Holy Bible in the Alyawarr language
of Australia

copyright © 2009 Wycliffe Bible Translators

Language: Alyawarr

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-10

PDF generated using Haiola and XeLaTeX on 18 Apr 2025 from source files dated 10 Nov 2023

284d4e02-292d-5bd8-a8a6-8360a307b937